

Evening Dogri (NSD) Bulletin

01-07-2025

आकाशवाणी

खबरां शिवि सूरी कोला

- केंद्री मंत्रिमंडल नै सब्बै क्षेत्रें च रोजगार पैदा करने ते सामाजिक सुरक्षा लेई रोजगार कन्नै जुड़ी दी प्रोत्साहन योजना गी मंजूरी दिती ऐ।
- भारत नै पाकिस्तान दी हिरासत च आम नागरिकें, मछेरें ते उंदी किशतियें ते लापता भारती रक्षा कर्मियें दी तौले रिहाई ते स्वदेश वापसी दा आह्वान कीता।
- डिजिटल इंडिया दे अज्ज 10 बरें पूरे, प्रधानमंत्री नरेंद्र मोदी होरें आखेआ जे एह मिशन हुन इक जन आंदोलन बनी गेआ ऐ ते एह आत्मनिर्भर भारत दे निर्माण दी कुंजी ऐ।
- अमरीका नै भारत गी भारत-प्रशांत खित्ते च रणनीतिक भ्याल दस्सेआ ते आखेआ जे इक बड्डा बपार सौदा तौलें गै घोषित होगा।
- पंजाब दे 6 बरें दे तेगबीर सिंह एल्ब्रस पर्वत पर चढ़ने आहले सब्बने शा घट्ट उम्री दे पर्वतारोही बनी गेन।
- भारत ते इंग्लैंड बश्कार महिला टी-20 श्रृंखला दा दुआ मैच अज्ज ब्रिस्टल च खेड्डेआ जागा।

<><><><><><>

Union Cabinet decisions

केंद्री मंत्रिमंडल नै देश च रोजगार सृजन गी बढ़ावा देने दे मकसद कन्नै अज्ज कोई 1 लख करोड़ रपे दी रोजगार सरबन्धी प्रोत्साहन योजना गी मंजूरी देई दिती। इस योजना दा मकसद 2 बरें दी अवधि च देश च साड्डे त्रै करोड़ शा मते रोजगार सृजन गी प्रोत्साहित करना ऐ। इंदे चा इक करोड़ 92 लख लाभार्थी पैहली बार नियुक्ति पाने आहले होंगन। एह योजना इक अगस्त 2025 थमां 31 जुलाई 2027 बश्कार सृजित नौकरियें पर लागू होगा। सूचना ते प्रसारण मंत्री अश्विनी वैष्णव होरें अज्ज नमी

दिल्ली च मीडिया गी मंत्रिमंडल दे फैसले दी जानकारी दिदे होई दस्सेआ जे इस योजना तैहत पैहली बार नौकरी पाने आहले कर्मचारियों गी इक महीने च 15 जहार रपे तोड़ी तनखा थ्होग। उनें आखेआ जे नियुक्तिएं गी अतिरिक्त रोजगार सृजन लेई 2 बरे तोड़ी दी अवधि लेई प्रोत्साहन लाहू दित्ता जाग जिसले जे विनिर्माण क्षेत्र लेई लाहू गी 2 बरे लेई बढ़ाया जाग। मंत्री होरें दस्सेआ जे 1 जहार 853 करोड़ रपे दी लागत नै तमिलनाडू च 4 लेन आहले परमकुडी-रामानाथपुरम खंड दे निर्माण गी बी मंजूरी दित्ती गेई ऐ।

<><><><><><>

India-pakistan Prisoners

भारत ते पाकिस्तान नै अज्ज इक दुए दी जेलें च बंद नागरिकें दी सूची दा आदान-प्रदान कीता। विदेश मंत्रालय मताबक भारत दी जेल च 382 पाकिस्तान दे आम नागरिक ते 81 मछेरे बंद न। पाकिस्तान नै अपनी हिरासत च भारत दे 53 आम नागरिक ते 193 मछेरें दे ना सांझे कीते न। भारत नै पाकिस्तान दी हिरासत च आम नागरिकें, मछेरें ते उंदी किशतयें ते लापता भारती रक्षा कर्मियों दी तौले रिहाई ते स्वदेश वापसी दा आह्वान कीता ऐ। भारत नै पाकिस्तान गी उनें 159 भारती मछेरें ते आम नागरिकें दी रिहाई ते स्वदेश वापसी च तेजी आहनने लेई आखेआ जिनें अपनी सजा पूरी करी लैती ऐ।

<><><><><><>

Digital-India

डिजीटल इंडिया प्रोग्राम दे 10 बरे पूरे होई गे न। एहदी शुरूआत प्रधानमंत्री नरेन्द्र मोदी होरें 2015 च कीती ही। एहदा मकसद हा इक नागरिक दे जीवन गी सखल्ला ते सरल बनाना ऐ। प्रधानमंत्री होरें आखेआ जे भारत नै इक सौ 40 करोड़ देशवासिओं दे सामूहिक संकल्प कन्नै डिजीटल भुगतान क्षेत्र च महत्वपूर्ण उपलब्धी हासल कीती ऐ। सोशल मीडिया दी इक पोस्ट च उनें आखेआ जे डिजीटल इंडिया अभियान दे 10 बरे पूरा होने दा एतिहासक दिन ऐ। उनें आखेआ जे मुख्य गी डिजीटल तौर पर

सशक्त ते तकनीकी तौर पर उन्नत बनाने आस्तै डिजीटल इंडिया अभियान 10 बरें पैहले शुरू कीता गेआ ह। प्रधानमंत्री होरें आखेआ जे इक दहाके मगरा पूरा मुख्य इक ऐसी यात्रा दा गवाह बनेआ ऐ जिसने केई सारे लोकें दे जीवन गी प्रभावत कीता ते सशक्तिकरण दे नमें दौर च शामिल होने च सहायक बनेआ।

<><><><><><>

EAM-India US

विदेश मंत्री डॉ. एस जयशंकर होरें पिछले 25 बरे दौरान भारत ते अमरीका बश्कार सरबंधें दी सराहना कीती। उनें आखेआ जे पिछले 5 अमरीकी राष्ट्रपतियें दे कार्यकाल च दौनें देशें बश्कार मजबूत ते बेहद सकारात्मक सरबंध रहे न। डॉ. जयशंकर अमरीका दी जात्तरा पर न, उनें आखेआ जे पिछले 25 बरें च भारत-अमरीका सरबंध मते मजबूत रहे न जिस च बपार, टेकनालजी, शिक्षा, सुरक्षा ते उर्जा दे क्षेत्र च व्यापक सांझेदारी होई ऐ। अमरीका नै भारत प्रशांत खित्ते च भारत गी इक मुख्य रणनीतिक भ्याल दे तौरा पर महत्व गी फी दोहराया ते आखेआ जे भारत ते अमरीका बश्कार बपार सरबंधी सोदा तौलें गै घोषित होगा। संवाददाताएं गी संबोधित करदे होई अमरीकी प्रेस सेक्रेटरी Karoline Leavitt होरें खित्ते च भारत दी भूमिका दी सराहना कीती ते अमरीका दे राष्ट्रपति डोनाल्ड ट्रम्प ते प्रधानमंत्री नरेंद्र मोदी हुंदे बश्कार मजबूत आपसी सरबंधें दे बारे बी लौऽ पाई।

<><><><><><>

Railone-Aap

रेल मंत्री अश्विनी वैष्णव होरें अज्ज Rail one ऐप दा शुभारम्भ कीता जेड़ा जे सब्बै रेल यात्री सेवाएं लेई वन स्टाफ समाधान ऐ। ओहू अज्ज नमी दिल्ली च Centre for Railway information system दे स्थापना दिवस पर आयोजित समारोह गी संबोधित करा रदे हे। उनें आखेआ जे रेल अधिकारिणं दा पूरा ध्यान यात्रियें दी सुरक्षा पर होना लोडचदा ऐ। श्री वैष्णव होरें दस्सेआ जे Rail

one ऐप राएं यात्री अनआरिखत टिकटां बी बुक कराई सकदे ना। एहू ऐप रेल सरबंधी पुच्छ-गिच्छ, पी.एन.आर, यात्रा योजना, रेल मदद सेवा ते ट्रेन च खाने-पीने जनेई सेवाएं तोड़ी असान पुज्ज प्रदान करदा ऐ। Rail one ऐप गी एंड्रायड प्ले स्टोर ते आई.ओ.एस ऐप स्टोर थमां डाउनलोड कीता जाई सकदा ऐ।

<><><><><><>

FM-SBI

खजाना मंत्री निर्मला सीतारमण होरें भारती स्टेट बैंक दे स्थापना दे 70 बरे पूरे होने पर ममारखां दित्तियां। इक सोशल मीडिया पोस्ट च उनें आखेआ जे भारती स्टेट बैंक दी स्थिति मती मजबूत ऐ ते एहू असलियत च हर भारतीय दा बैंक ऐ। खजाना मंत्री होरें आखेआ जे एहू बैंक 23 ज्हार शां मती शाखा, 78 ज्हार ग्राहक सेवा केंद्र ते 64 ज्हार एटीएम कन्नै अपनी सेवा देआ रदा ऐ। उनें आखेआ जे पिछले इक दाहके च भारती स्टेट बैंक नै डिजिटल बदलाव राएं अपने ग्राहकें गी काफी लाहू पजाया ऐ। सुश्री सीतारमण होरें राष्ट्र निर्माण च एहूदे महत्व दा जिक्र करदे होई आखेआ जे एसबीआई डेढ करोड़ करसानें, महिलाएं ते नेतृत्व आहले 1 करोड़ 30 लक्ख स्वयं सहायता समूहें, पी.एम स्वनिधि तैहत 32 लक्ख रेहड़ी-फड़ी आहले, 23 लक्ख एम.एस.एम.ई ते होरनें योजनाएं थमां लक्खें कारीगरें दी मदद करा'रदे ना।

<><><><><><>

CAT-Bangluru Stampede

केंद्री प्रशासनिक न्यायाधिकरण कैट नै भारती पुलिस सेवा दे वरिष्ठ अधिकारी विकास कुमार दा निलंबन आदेश अज्ज रद्द करी दित्ता। कर्नाटक सरकार नै पिछले महीने बेंगलुरु च होई दी भगदड़ दे सिलसिले च उनेंगी निलंबित करी दित्ता हा। न्यायमूर्ति संतोष मेहरा ते न्यायमूर्ति आर.के श्रीवास्तव हुंदी अध्यक्षता आहली पीठ नै आखेआ जे कार्रवाई प्राप्ते ते ठोस सबूतें पर आधारित नेई ही। भगदड़ दे

सिलसिले च निलंबित कीते गेदे 5 अधिकारिणं च शामिल श्री कुमार होरें राज्य सरकार दे फैसले गी न्याधिकरण च चुनौती दित्ती ही।

<><><><><><>

Youngiest Mountaineer

पंजाब दे 6 बरें दे तेगबीर सिंह एल्ब्रु पर्वत पर चढ़ने आहले सब्बनें शा घट्ट उम्मी दे पर्वतारोही बनी गेन। एहू रूस ते यूरोप दा सब्बनें शा उच्चा पर्वत शिखर ऐ। एहदी उंचाई 18 ज्हार 510 फुट यानि 5 ज्हार 642 मीटर ऐ। एहू दुनिया दी 10मीं सब्बने शा प्रमुख चोटी बी ऐ। तेगबीर नै 20 जून गी अपने पिता सुखिंद्रदीप सिंह हुंदे कन्नै चढ़ना शुरू कीता ते 28 जून गी एल्ब्रस चोटी पर पुज्जे हे। आकाशवाणी जलंधर संवाददात कन्नै गल्ल करदे होई तेगबीर होरें आखेआ जे उनें पर्वत पर चढ़ने दा फैसला करी लैता हा ते ओहू एहदे च सफल बी होए। उंदी मां जेड़ी जे स्त्री रोग विशेषज्ञ ऐन, डॉ. मनप्रीत कौर होरें आखेआ जे उंदी डाइट ते उंदे ट्रेनर बिक्रमजीत सिंह धुमन आसेआ दित्ती दी ट्रेनिंग नै इस उपलब्धि च अहम भूमिका निभाई ऐ।

<><><><><><>

Prez. Guru Gorakhnath

राश्ट्रपति द्रौपदी मुर्मू होरें अज्ज उत्तर प्रदेश दे गोरखपुर च गुरु गोरखनाथ आयुष विश्वविद्यालय दा उद्घाटन कीता। विश्वविद्यालय गी भारत दी प्राचीन परम्पराएं ते मूल्यें दा आधुनिक केंद्र दस्सदे होई राश्ट्रपति होरें आखेआ जे एहू संस्थान ना छड़ा उत्तर प्रदेश बल्के पूरे देश लेई स्वास्थ्य सेवाएं दे क्षेत्र च मील दा पत्थर साबित होग। राश्ट्रपति मुर्मू होरें आखेआ जे भारत च योग ते स्वास्थ्य गी संरक्षित करने दी परम्परा प्राचीन ऐ। उनें 2047 तोड़ी देश गी विकसित बनाने लेई इस परम्परा गी अगगे बढाने दी जरूरत पर बल दित्ता। अपने संबोधन च उत्तर प्रदेश दे मुख्यमंत्री योगी आदित्यनाथ होरें आखेआ जे राज्य च स्वास्थ्य ते संस्कृति दे इक नमें युग दी शुरूआत होआ'रदी ऐ।

<><><><><><>

GST-8 years

देश च वस्तु ते सेवा कर-जी.एस.टी लागू होने दे अज्ज 8 बरे पूरे होई गेन। इस कर प्रणाली गी देश च आर्थिक एकीकरण ते कर सुधारें दी दिशा च इक बड़्डे बदलाव दे रूपै च बरे 2017 च पेश कीता गेआ हा। इन्नै भारत च अप्रत्यक्ष करें दी श्रृंखला गी एकीकृत प्रणाली च बदली दित्ता हा। जीएसटी नै कर अनुपालन गी असान बनाया ते बवसायिं लेई लागत घट्ट कीती ऐ ते राज्यें च वस्तुएं दी निर्बाध आओजाई यकीनी कीती ऐ। जीएसटी परिषद आसेआ देश च वस्तु ते सेवा कर दी दरां निर्धारित कीती जंदी ऐ जिस च केंद्र, राज्य ते केंद्र शासित प्रदेश सरकारें दे प्रतिनिधि शामिल हुंदे न। वर्तमान समें च देश दी जीएसटी संरचना च 4 मुख् स्लैब 5 फीसद, 12 फीसद, 18 फीसद ते 28 फीसद न।

<><><><><><><><>

Women- T 20 Cricket

अंतरराष्ट्री महिला टी-20 क्रिकेट च भारत ते इंग्लैंड बश्कार 5 मैचें दी श्रृंखला दा दुआ मैच अज्ज इंग्लैंड दे ब्रिस्टल काउंटी ग्राउंड च खेड्डेआ जाग। इस कौला पैहले ट्रेट ब्रिज, नोटीगाम च खेड्डे गेदे पैहले मैच च भारत नै इंग्लैंड गी 97 रन्जें कन्नै हराइयै 1-0 दी बढत हासल करी लैती ऐ।

<><><><><><><><>

LG-Victim Families

उपराज्यपाल मनोज सिन्हा होरें अज्ज इक उच्चि सतह दी बैठक दी अध्यक्षता कीती जेड़ी पाकिस्तान समर्थित आतंकवादिएं आसेआ मारे गेदे लोकें दे परिवार आहलें दिएं चिंताएं ते मुद्दे दे नबेडे लेई सद्दी गेदी ही। उनें सरबन्धित डीसी-एं ते एस.एस.पीएं गी निर्देश जारी कीता जे इत सरबन्धी जान्नी बुज्झियै ठप्पे गेदे मामलें गी परतियै खोलेआ जा, एफ.आई.आरां दर्ज कीतियां जान ते एहू यकीनी बनाया जा कि मारे गेदे व्यक्ति दे आश्रत गी पैहल दी विनाह पर नौकरी दित्ती जा। अधिकारिं गी निर्देश दित्ता गेआ ऐ जे आतंकवाद प्रभावित परिवारें दिएं संपत्तिं गी जिमी माफिया जा आतंकवादिं दे समर्थकें कोला खाल्ली कराया जा। एल.जी होरें इब्बी आखेआ जे ऐसे लोकें दी पंछान कीती जा जेडे

आतंकवादिणं कन्नै जुडे दे हे ते आम कश्मीरिणं दिणं हत्याणं च मलव्वज हे ते एल्लै सरकारी नौकरी करै करदे ना। बैठका च फैसला लैता गेआ जे एल.जी सचिवालय च ते मुख सचिव हुंदे दफतरै च बकायदा इक विशेष सेल्ल कायम कीता जाहग जेडा आतंकवाद प्रभावित परिवारें दे मसलें दा नबेडा करने दा कम्म करोग। एल.जी होरें आखेआ जे केई दाहकें थमां खुल्ले फिरा करदे दोषिणं गी पक्क गै सजा दोआई जाहग।

<><><><><><>

LG-Amarnath Meeting

उपराज्यपाल मनोज सिन्हा होरें औंदी श्री अमरनाथ जी दी जात्तरा दिणं तैयारिणं गी मुकदा रूप देने दी समीक्षा लेई इक बैठक दी अध्यक्षता कीती। उनें अधिकारिणं गी निर्देश दित्ता जे ओहू जात्तरा दौरान गड्डिणं दी आओजाई बारै दिशा-निर्देश ते सलाह जारी करन तां जे आम लोकें गी जात्तरा कारण कुसै चाल्ली दी दिक्कत-परेशानी पेश नेई आवै। सब्बने डिप्टी कमिशनरें गी निर्देश दित्ता गेआ जे ओहू जात्रिणं दे ठैहरने आहलिणं थाहरें पर साफ-सफाई, बिजली-पानी ते होर दुइयां बवस्थां पूरी चाल्ली करी रक्खियां जान। जात्तरा गी पूरी चाल्ली सुरक्षित ते बवस्था आहले ढंगै सिर तोड़ चाढना यकीनी बनाने लेई मनोज सिन्हा होरें आपूं च नेडमा तालमेल बनाइयै कम्म करने पर जोर दित्ता तां जे कुसै गी कुसै बी चाल्ली दी दिक्कत-परेशानी दा सामना नेई करना पवै।

<><><><><><>

Dy CM-Yatra

उपमुखमंत्री सुरिंदर चौधरी होरें अज्ज श्री अमरनाथ जी दी पवित्र गुफा च मत्था टेकेआ। उनें आखेआ जे एहू जात्तरा जम्मू-कश्मीर दी एकता ते भाइचारे दी इक टकोहदी पंछान ऐ। इस मौके मीडिया आहलें कन्नै गल्ल करदे होई उपमुखमंत्री होरें सीमा सड़क संगठन-बी.आर.ओ. दी जात्तरा रस्ते गी नमे सिरेआ तैयार करने लेई सिफ्त बी कीती।

<><><><><><>